

سنجل فوق ال ٣٠  
منى الشامى

اسم الكتاب : سنجل فوق ال ٣٠

اسم الكاتب : منى الشامى

رقم الإيداع : ٢٠١٥/٢٦٥٤٧

الترقيم الدولي : ٩٧٨٩٧٧٦٥٢٧٤٧٨

الطبعة الأولى : ٢٠١٥

مراجعة لغوية ، وإخراج : زحمة كتاب

غلاف الديوان :

صادر عن : مؤسسة زحمة كُتَّاب للثقافة والنشر

١٥ ش السباق - مول الميريلاند - مصر الجديدة



[www.za7ma-kotab.com](http://www.za7ma-kotab.com)



[www.facebook.com/za7ma](https://www.facebook.com/za7ma)



[www.facebook.com/za7makotab](https://www.facebook.com/za7makotab)




[za7ma-kotab@hotmail.com](mailto:za7ma-kotab@hotmail.com)

© جميع حقوق الطبع والنشر محفوظة

لمؤسسة زحمة كُتَّاب للثقافة والنشر

المشهرة قانوناً بسجل تجاريّ رقم / ٨٤٤٨٦



مؤسسة زحمة كُتَّاب للثقافة والنشر

## الفهرس

٨	سنجل فوق الثلاثين
١٤	يادى الوجع
١٨	ولما نحب
٢٣	عن الاحاسيس
٢٥	ناس
٢٦	غربه
٢٩	الجسد والروح
٣٢	عزيزى الشعر
٣٣	الليل
٣٦	بدون إطاله
٣٨	البعد بيهوانا
٤٠	عزيزى الوحيد

لمسة إيد ----- ٤٣

عن الراحة ----- ٤٥

ياما في القلوب يا حاوى ----- ٤٧

ريغريش ----- ٥٠

خيالك في التلاجه ----- ٥١

الشخص المستنى ----- ٥٢

الموت اصبح عاده ----- ٥٤

بلياتشو ----- ٥٥

النوم حاله ----- ٥٩

رباعيات ----- ٦٠

-اعملك شاي ؟! ----- ٦٣

انا الغريب ----- ٦٤

رحمة أحاسيس ----- ٦٧

بنفكر قبل ما نتكلم ... ----- ٧٠



۷۱ ----- فنجان قهوه

۷۵ ----- قلم بسنوں

۷۶ ----- قول الحق

۷۷ ----- .. لسه باقى ..

۷۹ ----- لابس وش

۸۰ ----- إجابہ ورد

۸۱ ----- متأخر جدا

۸۲ ----- مغصوب تعیش

۸۳ ----- فابریکا IIII ..

## المقدمة

سيداتى ... أنساتى ... ساداتى  
إتكلّموا

كل إنسان جواه احاسيس ومشاعر وإنفعالات  
من حقه يعبر عنها بالكلمه أو بالرأى أو  
بالخيال

..ولو دعبنا جوانا ... ودورنا فى كل ركن  
فينا هربان مننا هنكتشف نفسنا من جديد  
دى هوايتى ... ادعبس ... واعبر عن اللى جوه  
كل واحد مننا يمكن تقابل كلمه أو معنى أو  
قصيده تخليك تقول .. انا ... اهه!!  
تلاقى فيها نفسك البسيطه واحساسك المستخبي  
..وتترجم اللى جواك ... ترجمه ..... ببساطه  
....شعر عاميه!!!  
د. منى الشامى

الاهراء



....إهداء إلى أبي وأمي

الحب التي بجد

## سنجل فوق الثلاثين



انا سنجل فوق الثلاثين ..  
بعانى وزىي بالملايين ..  
انا مش بايره او راكده ..  
ومش لازم أكون حاقده ..  
ولا عايشه ب ٢٠٠ عقده ..  
ومش يانسسه وحامله الهم ..  
ومش بس الجواز عندى مجرد أم ..  
ومش هضطر اتجوز ..  
عشان العمر بيعدى ..  
ومش هسمح لأى سئيل ..  
ينول ودى ..

انا سنجل فوق الثلاثين ..



لكن صامده ..

جامده ..

ومش مغصوبه انتازل ..

وارضى بأى شئ وخلاص ..

عشان شكلى ما بين الناس ..

ومش هرضى بجواز بانس ..

هروبا من لقب عانس ..

انا سنجل فوق الثلاثين ..

لكن عندى حياه وطموحات ..

ممتش لسه يا اخوانا ..

ولا عايزه قاموس دعوات ..

ومش طول النهار فاضيه ..

وباللى انا فيه اكيد راضيه ..

ومش طالبيه كلام ستات ..

وهمسات ..

وهمهمات ..

انا سنجل فوق الثلاثين ..

لكن مسئوله عن نفسى ..

وعن احوالى وحياتى ..

ووائقه فى نفسى وفى ذاتى ..

بشوف زيك شئون البيت ..

وبستمع بهواياتى ..

انا سنجل فوق الثلاثين ..

بحب الحب ..

ونفسى احب ..

وعايزه اتحب ..

ومش معنى اني صاحبة رأى ..

اكون طوبه ومن غير قلب ..

ومش حسداكى على حالك ..

ومش هفطس على عيالك ..

ومهما تعیدی وتزیدی ..  
عن الدبله وجمال ایدی ..  
انا مش عایزه اکون زیك ..  
جواز باهت وتقلیدی ..

انا سنجل فوق التلاتین ..  
وده عمری ومش ذله ..  
ولا علہ ..  
ومش ملجأ لکام واحد ..  
بیستعبط ویسلی ..  
ولو یوم کنت مکتبه ..  
فده وارد لکل الناس ..  
ولو لقیتونى مبسوطه ..  
فمش لازم عریس وجواز ..  
بحب البس واکون حلوه ..  
عشانی مش عشانه هو ..

وتفسيركم لكلماتي ..

لضحكاتي ودمعاتي ..

انفعالاتي ..

خنفتي بجد ..

ومش طايقه انى اسمع حد ..

وبينى وبين عقول الناس ..

طريق واتسد ..

انا مليت من التمثيل ..

ونبرة حسره مفتعله ..

ودم ثقيل ..

جوازي ده شأن خاص بيا ..

وعدمه مش لعيب فيا ..

وانا وربى ما بينا حوار ..

وبينا كلام ..

فمش مطلوب من الدخلاء ..

غير الإحجام ..



## ياوى الوجد



يادى الوجد ..  
يادى القلوب المجروحين ..  
يادى العيال الميتين ..  
إن كان جدع أو مش جدع ..  
و الامهات المكلومين ..  
على ابن ودع حضنها ..  
لو حتى ضل.. يفضل ضناها وابنها ..  
يادى الزمان اللى ورانا البدع ..  
وموت بيحصد ..  
ولا حد عارف ان كان خدعنا ..  
ولا هو اللى إتخدع ..  
يادى العساكر ..  
اللى صفاها الرصاص ..

كام نعيش ملفوف بالعلم ..  
كام أم موتها الألم ..  
حاسس بأم اتقالها ..  
ابنك مش بس مات ..  
ده إنداس ..  
يادى الخناق اللى فى حارتنا ..  
واللى انتقل بقى جوه بيتنا ..  
يادى الكلام ..  
يادى شهوة الانتقام ..  
يادى الأرف ..  
وشعب ضل وانحرف ..  
وعيشه ضلت سعيها ..  
وامه فقدت وعيها ..  
يادى تقديم التعازى ..  
مع كل موته فى مطبل وانتهازى ..  
الفكر نازى ..

والجهل غازی ..  
والدم بقى أرخص تمن ..  
یادی الزمن ..  
الحزن اتسحب کمن ..  
والعتمه جوه وبره منا ..  
بتموت قلوبنا سنه سنه ..  
فینا اللى مات من غیر سبب ..  
فینا اللى سلم م التعب ..  
فینا ناس اتیتموا ..  
وناس بعقل اتکلموا ..  
فاتکمموا ..  
ثم یأسوا وسلموا ..  
موجوعه على موتک یا دفعه ..  
مقهوره على دمک یا شعب ..  
حبة دیابه بتنهشک ..  
منک وفیک ..



الجهل عشش فى المكان ..  
والحزن بيدق البيبان ..  
والموت حصار ..  
آدى اللى صار ..  
يادى الوهن والإنكسار ..

\*\*\*

## ولما نحب



ولما نحب ...

بننسى الدنيا وهمومها ...

وتهرب م السما غيومها ...

ونفتح بوابات القلب ...

ولما نحب ...

بتتغير ملامحنا ...

ونبقى فى لحظه مش إحنا ...

ولا بنعرف ...

منين جينا ولفين روحنا ...

تدوب آناطنا وجروحنا ...

نسافر فى الفضا بروحنا ...

عشان قلنا ...

عشان بوحنا ...

عشان بنحب ...

ولما نحب ...

بنسهر ليلنا بنفكر ...

فى كلمه فى شوقنا قولناها ...

فى نظرة لهفه شفناها ...

فى لحظة صمت عشناها ...

فى دقة قلب ...

فى رعشة إيد ...

فى ضحكه وهو جاى بعيد ...

ولما نحب ...

نخاف م البعد ...

وفترات السكوت والصمت ...

ورد الفعل بعد غياب ...

ولهفه لكل دقة باب ...

ودقة قلب ...

مع رنة ماسيدج أو ميسد ...

وتحضير للكلام والرد ...

ونظرة عين ...

بتتمنى تشوف اسمه ...

وشوق وحنين لنبراته ...

لكلماته ...

لضحكاته ...

عشان فى غيابه كل الدنيا بهتانه ...

معاندانا ...

وتاعبانا ...

وآه يانا ...

عشان بنحب ...

بنتعرف على ذاتنا ...

بتتكشف مشاعرنا وملذاتنا ...

ونتفاجئ بنزواتنا ...

وتتجزأ مبادئنا ...

مش إحنا فى فرحنا وضيقنا ...

يطول شوقنا ...

نقول فوقنا ...

ولا بنفوق ...

ويغلبنا الحنين والشوق ...

عشان واهنين ...

عشان عاشقين ...

عشان بنحب ...

ولما نحب ...

مننساش ان فيها فراق ...

ونسأل كل واحد داق ...

عذاب الداء ...

فلو هتحب ...

تحمل كل كسرة قلب ...

يا إما تقفل الابواب على قلبك ...

وبالترايبس ...

وتبقى تعيش ...

يعيش قلبك بحريه ...

يعيش ومشاعره سريه ...

ولا فى يوم تبقى ضل حبيس ...

للمسة إيد ...

ولمعة عين ...

ودقة قلب ...

عشان بتحب ...

\*\*\*

## عن الأحاسيس



عن الأحاسيس وخباياها ..  
ودقة قلبنا إياها ..  
وسحبة روح تدوبنا ..  
وحالة ضعف تتعبنا ..  
ونسيان الحياه والناس ..  
وعجز لوصفك الإحساس ..  
وتفكيرك في ضحكاته ..  
وعشقك سمته وسماته ..  
وآناته ..  
وكلماته ..  
ونبرة صوته وسكاته ..  
عن الاحاسيس ومشاويرها ..  
وتبديلها لخطوط سيرها ..

وتدبيرها ..

وتبريرها ..

وقوتها في خداع غيرها ..

عن القلب اللى فيه حوادث ..

امير القصر .. ست الحسن ..

بيتنقل بين الدقات ..

وينبض فرح مكسى بحزن ..

عن الارواح وتوائمها ..

وتصديقك لعشق الروح ..

تسيبك عايش الوحده ..

وهى للحبيب بتروح ..

\*\*\*



## ناس



- فى ناس بننساهم وهما تملئ فاكرينا .
- وناس تانيين بينسوننا وهما إحتلوا تفكيرنا .
- وناس بتحب تسمعنا .
- وناس فى حياتنا لها معنى .
- وناس بتعدى كده وخلص .
- وناس بتتوه ما بين الناس .
- وناس فى قلوبنا أقرب حد .
- برغم البعد .
- وناس وكأنهم منا .
- حسينا وفاهيمنا .
- وناس ويانا طول الوقت .
- وبينا ألف سد و سد .

غریہ



عن إحساس انسان ..

محطوط فی مکان ..

مش حاسس بیه ..

ولا قادر حتی یبص علیہ ..

مش سامع صوت الناس حوالیه ..

حیرانه عنیه ..

قلقانه ایدیہ ..

مکسور قلبه ..

وبیسأل نفسه أنا جیت هنا لیه ..

أنا جانی بجد أم مجنی علیہ ..

أنا واعی بجد أم مغم علیہ ..

أنا جیت هنا لیه ..

أنا بين الناس الى مينفعش اكون بينهم ..  
او اكون منهم ..  
انا من هؤلاء الى محيطهم غصين عنهم ..  
ملت منى .. وملت منهم ..

ورجعت سألت سؤال العمر ..  
انا جيت هنا ليه ..  
أنا جوه خيال ..  
بلا أى حدود أو مدى ومجال ..  
بلا أى محال ..  
الواقع موت والعيشه خيال ..  
موجوده بجسمى فى مكانى ..  
والروح هايمه فى عالم تانى ..  
الموت للجسم والروح لحياء ..  
اول ما بتخرج أرواحنا ..



بنموت إحنا ..  
وهى ولا تموت ..  
وتسافر بين السما والأرض ..  
وتعيش فى رحاب رب الملكوت ..

\*\*\*

## المسر والروح



مهما كان البرد قاسى ..  
الدفا فى حضنك ملاذى ..  
حتى لو ان الخيال بقى م المحال ..  
حتى لو حنت عيوني انها تسلم عليك ..  
حتى لو فضلت ايديا فى انتظار لمسة ايديك ..  
انت حاله بس تحقيقها استحاله ..  
انت ادم اللى من ضلعه اتخلقت ..  
واتسرقت ..

روح بتكمل لما بتدور عليها ..  
روح هتكمل يوم ما هتبص فى عنيتها ..  
قوتى فى ضعفى قصائدك سر خوفك ..  
ويا ضعفك بين ايديا لما أشوفك ..

انت منسوج جوه منى ..  
 بس مش شايفاك لأنى ..  
 حاسه بوجودك معايا ..  
 حتى لو تاهت ملامحك وسط ملايين البشر ..  
 والسنين قفلت عليا فى حفرة مسدوده بحجر ..  
 راضيه اكون من غير وجودك الاعتيادى ..  
 بس عايشه وياك جوه عالم افتراضى ..  
 حاله م الفصل المشدد بين الجسد والروح ..  
 مش اى حد معاه هروح ..  
 مع انى مش أجمل ما شفت ولا انت اجمل ما  
 رأيت..

وعيوبى وعيوبك كتيره تهد بيت ..  
 مع انى مش عروسة البحر وانت مش راكب  
 فرس ..  
 لكن بتوصل جوه قلبى مهما وقفت الحرس ..

ارض الخيال أوسع من الليل والسما ..  
وياها برسم ملحمه ..  
فن وجنون ..  
الرسمه كامله إنما محتاجه لون ..

\*\*\*

## عزيزى الشعر



عزيزي الشعر..

من فضلك متخلّنيش..

انا عاجزه ومش لاقيه الكلام حتى..

برغم ان اللى جوايا حاجات شتى..

وللاّتى مفيش حتة..

برغم الزحمه جوايا..

بشخبط بالقلم وخلص..

خلاص الشعر مش غايه..

كلامى بيشهر الإفلاس..

عزيزي الشعر..

دراما الروح بقت اكبر من القافيات..

وبنهين القلوب لما بنحصرها ما بين ابيات..

شجون الروح وأفراحها بتتجلى بلا كلمات..



## الليل



ويجي الليل ..

بأفكاره وأسراره ..

بطعمه الحلو ومراره ..

بضحكاته واناته ..

بصوته العالى وسكاته ..

ويجي الليل ..

يصحى فى القلوب ذكرى ..

ويرسم فى العيون صوره ..

يحلى الروح بكام فكره ..

ويكسر حاجه مكسوره ..

ويجي الليل ..

عشان نتعب ..

نقول هنام عشان نهرب ..

وننسى الناس ..

وننسى ملامح الإحساس ..

نعيش فى الحلم ..

حياه ثانيه .

ولو كانت حياه فى ثانيه .

ويجى الليل ..

وتيجى معاه وشوش عدت .

وكلام اتقال .

وتفكير فى الحياه ذاتها .

بأحزانها وملذاتها .

بمعناها .

بمغزاها .

ب ليه وإزاي ..

ويجى الليل .

سكون مجنون .

بيجرحنا لكنه حنون .

بحب الليل. .  
وصمت الليل. .  
وهمس الليل. .  
وجرح الليل. .  
وتيه الليل. .  
بحب الليل. .  
عشان بليل. .  
بقوله يا رب . .

\*\*\*

## بدون إطلاله



بدون إطلاله ..  
هحاول أوصف الحاله ..  
دى حالة حب لا محاله ..  
ما بين نفسين ..  
تجاوز فكرة الأشواق ..  
تجاوز لهفة العشاق ..  
وعدى حدود كلام الحب والآات ..  
تخطى حواجز الرغبات ..  
وعشش فى القلوب لسنين ..  
سكن وشعور بملكيه ..  
أنانيه ..  
وتضحيه ..  
انا هو وانا هى ..

نشوفه فى فيلم او نلقاه فى اغنيه ..  
 فى كل مكان حواليا ..  
 معدتش القرب فيه غايه ..  
 عشان الروح بقت واحده ..  
 ولو كتبوها فى روايه ..  
 معانى الكون هتتنحى عشان هتخاف تكون  
 جاحده ..  
 دى حالة عشق مجنونه بندرتها ..  
 ومسجونيه فى غرابتها ..  
 لا معروف كيف كان البدء ..  
 ولا معروف نهايتها ..

\*\*\*

## البعرييهوانا



- علشان البعد بيهوانا .
- ارجوك ابعـد .
- متجيش تانى .
- انا نظرة عينك تعبانى .
- انا لمسة ايدك وحشانى .
- ارجوك ابعـد .
- مش لازم انك تنسانى .
- اهوانى ..
- إعشقتى كما يحلو لقلبك ..
- انا اصلا بتنفس حبك ..
- والفرقه سلوك غير انسانى .
- ارجوك ابعـد .
- القرب اكيد طبعه أنانى .

وان كان البعد ملاذ مضنى ..

او عدنى ..

خليلي القلب الوجدانى. .

ما هو أصل حلاوة طعم الحب ..

مش امر بسيط أو مجانى ..

\*\*\*

## عزيزى الوحيد



عزيزى الوحيد اللى خد قلبها ...

فهل انت حقا ... بتحبها ...؟!!

وتملك قلبا اهل لها ...؟!!

عزيزى الحبيب ...

يحبك قلب ..مدقش لحد ...

وقافل ببيانه بميت الف سد ...

وكاتب عليها بلاش تقترب ...

ده قلب انكسر ثم مل وتعب ...

ورغم الحصار ...

وطول الانتظار ...

تسلل اليه شجن نبض قلبك ...

وكسر مبادئه واعلن (بحبك) ...



فحاسب عليه ...

عزيزى الوحيد الذى نال ودها ...

أتدرك صعوبة حوار قلبها ...؟!

هتتعب معاها ...

هتتعب بلاها ...

هتسكن فى قلبك بلا اى قيد ...

هتدمن كلامها ...

ونظرة عنيتها ...

ومهما ابتعدت هترجع إليها ...

عشان هى واحده مفيش زيها ...

فمش م السهولة تخوض حبها ...

فلو ناوى تقسى ولو ناوى تنسى ...

لا يمكن هتقدر ...



وكل اما تبعد فى قلبك هتكبر ...  
كما الدم فيك ...  
ولو ان قلبك بيعطف عليك ...  
بلاش حبها ...  
عزيزى الحبيب اللى خد قلبها ...  
يا تنجو بقلبك .. يا تأسر لها ....

\*\*\*

## لمسة إيد



عارف ..

اول مره لمست ايديا ..

كان احساس ف غرابته بسيط ..

مش إحساس كتب الحواديت ..

حسيت ..

انك جوه فى دمي سريت ..

كانت لمسة قلب وايد ..

حسيت ..

ان انا بنتك ..

ايوه حبيبتك ..

حد قريب جدا منك ..

حد يخصصك ..

احساس ضعف فى غاية القوه ..

قوة ضعفى بلمسته هو ..

دقة قلب فى لمسة إيد ..

إحساس حب بجد فريد ..

\*\*\*

## عن الراحه



عن الراحه ...

عن الروح اللى مرتاحه ...

عن الألفه ...

ورفع حواجز الكلفه ...

عن الغربه ...

عن الوحده ...

عن المعاناه ...

وتوهان العيون بحثا...

عشان تلقاه...

عن الاصرار بلا جدوى ...

عشان ننساه ...

عن الدنيا وضحكتها ...



عشان وياه ...  
عن المأساه ...  
فى وقت البعد ...  
محدث فينا طابق حد ...  
محدث فينا عايز حد ...  
وحالة عند ...  
وبعد فى بعد ...  
ووقت طويل يفرقهم ...  
عذاب العشق بقى دائهم ...  
وشوق وحنين ...  
ورغم قرار اكيد بالهجر ...  
عارفين إنهم راجعين ...

\*\*\*

## ياما في القلوب يا حاوى



ياما في القلوب يا حاوى ...

ياما في القلوب حواديت ...

كان ياما كان قال الراوى ...

كل كلام القلب يا ريت ...

كان ياما كان ...

خطفة قلب ولمعة عين ...

حب سنين ...

غيره وخوف ...

شوق وكسوف ...

قلب وحيد ...

أو قلب حزين ...

كسرة نفس ...

عتمة روح ...

جرح يمكن أو مجروح ...

قلب مسافر ...

قلب مهاجر ...

قلب في قمقم ...

قلب بينبض من غير صوت ...

قلب كل مشاعره سكوت ...

قلب بيقسى ...

وقلب حنون ...

قلب بيرفض ...

كل جنون ....

قلب بيغدر ...

قلب بيكسر ...

قلب بيقتل كل حبيب ...

قلب اتعود يبقى غريب ...

قلب مؤقت ...



عایش بس ...  
 قلب مزقطط ...  
 حب وحس ...  
 قلب کیانه جوہ حبیبہ ...  
 مش بیسیبہ ...  
 قلب ومات ...  
 قلب بیعلن عن مأساته ...  
 بالدقات ...  
 قلب یغنی ...  
 قلب ومنی ...  
 قلب و غاوی ...  
 مهما حکینا فی وصفه حکاوی ...  
 لسه کتیر ...  
 یاما فی القلوب یا حاوی ...

\*\*\*

## ريفرش



وهنفضل نعمل ريفريش ..  
نتنوقع اكثر فى العش ..  
نتفاجئ ان العمر سرقنا ..  
بمرايه تغش ..  
ما إنك شاييف نفس الوش ..  
حدوة عمر ومحكيه ..  
زى الأفلام المنسيه ..  
واربع ابواب قفلوا عليا ..  
العقل اتصومع فى مكانه ..  
والقلب خلاص سك بيبانه ..  
والعين بتشوف من غير ما تحس ..  
واتحصرت ارواحنا فى شاشه ..  
ملاحنا بدون أى بشاشه ..  
عاشينها وبس ..

## خيالك في التلاجه



- حط خيالك فى التلاجه .
- وارجع للواقع بسذاجه .
- كل ما قلبك يكتب حاجه .
- إمسك استيكتك وامحيه .
- كل خيال بالطبع محال .
- حتي بتغيير الأحوال .
- حاول تتأقلم ع الواقع .
- متلفش وتدور حواليه .
- شوف فى الواقع حاجه جديده .
- حاجه بعيده .
- حاجه تنسيك بلاويه .
- يمكن يوم تفتح تلاجتك .
- وتقدم خيالاتك ليه .

## الشخص المستنى



عزيزى الشخص المستنى ..

متستناش ..

سنين عدت على ملامحك ...

محستهاش ...

وزار الشيب خصل شعرك ..

ومستحياش ..

خطوط العمر بتزاحم ..

ودق الساعة مش راحم ..

مفيش حاجه هتستنى ..

بلاش تحلم وتتمنى ..

ومتبعش اللى جاى ببلاش ..

متستناش ..

وحصل ناس كتير عدت ..

وایام ساده من غیر وش ..  
ولا اتحسبت ولا اتعدت ..  
عشان بتبص من بره ..  
وحسیت بالحیاه مره ..  
فحاول بس لو مره ..  
متستناش ..

\*\*\*

## الموت أصبح عاوه



- . خلاص الموت أصبح عاده .
- . ادعوا على سبحه وسجاده .
- . واستنوا يموت واحد تانى .
- . الموت بقى سهل ومجانى .
- . انسان له حياه وأهل وأحباب .
- . بقى بس رقم فى سجل طويل .
- . وإن كان متشال، كان يوم بيشيل .

\*\*\*

## بلياتشو



بلياتشو ..

بلياتشو صحيح إنما ايه ..

الوان الطيف مرسومه عليه ..

ببيص عليه فى الليله الوف ..

يحفظوا تفاصيل وشه المألوف ..

يخرجوا يتحاكوا عن اللى شافوه ..

يمكن بينهم ولا يوم عرفوه ..

اصل الالوان اللي رسمها فنان العرض ..

بتغطى ملامح حقيقه من روح الأرض ..

من لون الطين ..

الى الخالق من روحه خلقها وسماها البنى

آدمين ..

بلیاتشو صحیح إنما انسان..

فنان ..

جواه احزان ..

جواه مواجع ..

وحنین للأصل اکید راجع ..

مجنون باللیل ..

والصبح حزین ..

من عیشته ما بین البنی آدمین ..

یضحك ساعه ویبکی سنین ..

ویا ریت الضحکه حقیقه ..

تمثیلیه ..

ده لزوم الساعه الهزلیه ..

اللی بیضحك بیها علی نفسه ..

واللی الناس علی نفسه بتضحك ..

ده عمل مرهق ..



أما صحيح حنة بلياتشو ..  
 سن الحزن فى ضحكته خدشه ..  
 ظلم الناس على خلقتة لطشه ..  
 يعنى حزين ..  
 مسكين ..  
 بنى آدم م البنى آدمين ..  
 بنى آدم بيلون وشه ..  
 مش بيعشه ..  
 علشان الوانه بتتشال ..  
 يعنى محال ..  
 يفضل بلياتشو ..  
 الخوف من الوان طبيعیه ..  
 طبعت لون الدنيا عليا ..  
 بالمندیل ..  
 مهما تشیل ..  
 مهما تصب عليه بالمیه ..

تفضل حيه ..

تفضل على قلبك مطبوعه ..

على وشك مصنوعه ..

لو مختار ..

جرب شيلها بمية نار ..

جرب تسكت ليل ونهار ..

أدى مرأيتك .. وادى حكايتك ..

بص عليك لو كانت اتشالت ..

بص بجد ..

شايف حد ..

\*\*\*

## النوم حاله



وساعات النوم سيكون حاله ..

علشان تهرب ..

أحيانا .. دائما .. لا محاله ..

النوم اصعب ..

وساعات الحلم يكون متعب ..

وساعات الوعي يكون مرعب ..

وساعات بنخاف ..

وعشان النوم أأمن مهرب ..

شاييف أسرارنا واحلامنا ..

ولا عمره نطق او قال ايه شاف ..

\*\*\*\*

## رباعيات



انا كنت عاصى من زمان وجبان  
كان وصفى انى بالقليل حيوان  
كلمة يا رب اتمكنت منى  
خلتني من تانى اكون انسان

\*\*\*

فضلت اجل صحتي والعمر فات  
واقول لنفسي بكره هبدأ فى المعاد  
مكنتش اعرف انه بيسابق معايا  
وخسرت سبقى واعلنوا فوز الممات

\*\*\*

الدقن مش حليه ولا النقب آيه  
لو كانوا بالصدفه او للرياء غايه  
متجيش وتوعظنى وتقولى توب وإرجع  
الدين ده مش شكلى ..الدين ده جوايا

\*\*\*

عاشين نفكر فى الحياه وكأنا هنعيش دهور  
وكأن بكره مالوش نهايه ..مع انها مجرد  
شهور  
وكل يوم بيموتوا ناس كانوا لسه بينا من دقائق  
نقول يا عينى ويا عينى لما نكون مكانهم فى  
القبور

ولو إنك ..  
فى يوم احترت بين طريقين ..  
طريق اختاره احساسك ..  
والتانى اختاروه ناسك ..  
اسمع لقلبك ..  
ولو حتى مشيت وحدك ..

\*\*\*

## اعملك شای ۱۹



اعملك شای ..!!؟..

الحب .. مش بس فراشه و نغمة نای ..

الحب .. حياه

انسان ببيعش جوه حياتك من غير إزای ..

إنسان واحد يمكن ييجى ويمكن ميجيش ..

كونك من غيره ..

احسن ما تكون مع غيره وتموت ما تعيش ..

\*\*\*

## أنا الغريب



(أنا الغريب )

أنا الذى تايه فى الطريق ...

وسط البشر ...

والعتمه بتزق القمر ...

ومعدتش ضى ...

أنا الذى بين كل الوشوش ...

معرفش وش ...

مع انى عايش وسط منهم من زمان ...

مع انى واخد ع المعالم والمكان ...

مع إنى حى ...

أنا الغريب ...

اللى اتنسى ...

ورضيت اكون خصم وحكم ...



وإن كنت عايش ولا ميت ...  
 فى الخبر صورہ ورقم ...  
 أنا الورق ...  
 وملف م الدنيا اتسرق ...  
 ورقة ميلاد ...  
 ورقة نجاح ...  
 ورقة جواز ...  
 ورقة سفر ...  
 ورقة وفاه من جوه قبرى اللى إتحفر ...  
 أنا الغريب ...  
 كما جيت ...  
 مشيت ...  
 فى النص عشت ...  
 أنا الكتاب اللى اتكتب قبل الحروف ...  
 أنا المشاعر كلها وكاسيها خووف ...  
 أنا الظروف ....

انا الحنين ...

ومعاني دبلى من سنين ...

انا المتاهه ...

حدوته واصله لمنتهاها ...

قبل البدايه ...

الكل شاف تتر النهايه ...

انا الروايه ...

انا الروايه والروائى والبطل ...

إقراها هتحس بمثل ...

حالة سخف ...

ودراما خاليه من الشغف ...

وكلام رتييب ...

وكتاب على الرف إتركن ...

عنوانه كان ...

... (انا .... الغريب) ...

\*\*\*

## زحمة أحاسيس



زحمة أحاسيس ..  
والعقل بيقفل كل طريق. ..  
قدام خطاويها ومشاويرها. ..  
تتأخر وتزاحم غيرها ...  
وتموت فى النص. ..  
إحساس خايف ...  
إحساس قلقان ...  
إحساس يائس ...  
شاحب دبلان ...  
إحساس بالحب ...  
دايما بيزاحم جنب القلب ...  
ما يلاقى أمان ...  
إحساس بالخوف ...

بيلف يطوف ...  
 وببيني حصونه فى كل مكان ...  
 إحساس بالضيق ...  
 بتقابلته تملئ فى كل طريق ...  
 وفى كل تزاخم إنسانى ...  
 إحساس بىخبط فى التانى ...  
 والموقف صعب ...  
 أحاسيس بتعافر وتسافر ...  
 من درب لدرب ...  
 لخطه حسيه ونفسيه ...  
 إحاسيسى ببتحكم فىا ...  
 وبتصرخ دايمًا من غير صوت ...  
 إحساس بالزحمة ...  
 سجين مكبوت ...  
 وإن طلب القلب الحريه ...  
 بيرد العقل ...

"شغب مرفوض"...

أحاسيس عماله بتتراكم ...

وبتخضع أكثر للحاكم ...

وبترضى تموت ...

حاله من الحرب الأهليه ...

وطوفان أحاسيس هاجمه عليا ...

مش عارفه تفوت ...

أحيانا تأخير الزحمه ...

بيكون رحمه ...

علشان تلحق تعمل مبسوط ....!!!!

\*\*\*

بنفكر قبل ما نتكلم ...



بنفكر قبل ما نتكلم ...

مع ذلك برده بنتألم ...

وبنندم على كلمه اتسجنت ...

واتنفذ فيها الإعدام ...

ده كلام ...

فيها ايه لو قلت اللى فى قلبك ...

عن ضيقك غضبك أو حبك ...

فيها إيه؟! ...

ده العمر قرار ...

ومفیش تكرر ...

لو حتى كلامك مش ملكك ...

طب عايش ليه؟! ...

\*\*\*

## فنجان قهوة



فنجان قهوة ...

يدوب ع الريحه...

قاعده مريحه ...

دوسة off لكل الناس ...

مج لاتييه ...

فى ركن كافيه.. ..

واقفل عقلك بالترباس ...

اسبريسووو ...

شمه وحسه ...

إشحن قلبك بالإحساس ...

لما تكون فى معاد مع قهوه ...  
إنسى الوقت ...  
إلبس شيك ...  
واحضن دخانها حواليك ...  
حس بنبضتها فى إيديها ...  
اهمس ليها ...  
دوقها بلطف ...  
سحر القهوه بيخطف خطف ...

كل ما روحك تطلب منها ...  
اخرج منك ...  
واهرب ليها ...  
لو لدقايق ممكن تهرب ...  
من فضلك استمتع بيها ...  
  
كن لها خل ...



حب القهوه مش بيدل ...

ولا بيقل ...

ولا بيمل ...

أو يتلاشى مع الأيام ...

طعم القهوه نفس الطعم ...

لن تنساه ...

لن تسلاه ...

علشان مر ...

بعد مرار القهوه بتشعر ...

إنك حر ...

كل مرار لو حتى بسكر ...

يفضل مر ...

مش بيغش ...



عارف ليه !!؟  
علشان كل الناس بوشوش ...  
أما القهوه .. بس بوش ...

\*\*\*

## قلم بسنون



قلم بسنون ...  
وبيشخبط على الدنيا ...  
منين ما اتحط ...  
قلم مجنون ...  
بيتحدى الملل بالخط ...  
ولو كان خط مش مفهوم ...  
لكن بيونس الصفحات ...  
بياض الصفحه لو طول ...  
بنتحول ...  
لحلم ومات ....

\*\*\*

## قول الحق



لو قول الحق فى دنيتكم. ..

بقى عيب. ..

فأنا كلى عيوب. ..

لو قوة صوتى بتتعبكم. . .

فأنا قالب طوب. ..

انا غاويه صراحه. ..

بتعب م الراحه. ..

وبحب الجد. ..

ولا عمرى همئى دور تانى. ..

او أنافق حد...

ان كنت غريبه فى دنيتكم. ..

عندى دنيايا. ..

لا أنا عايزه اكون واحد منكم ...

ولا عايزه يكون حد معايا ...

\*\*\*

..لسه باقى ..



أيوه زى زى غيرى ...  
ايوه مش فارق معاك ...  
كنت فاكراك مختلف ...  
بس لازم اعترف ...  
بالغباء ...  
والعشم ...  
معنى لازم يتردم ...  
لما جه وقت الألم ...  
وافتكرت انك هتسأل ...  
او بتقل ...  
او حزين ...  
بس بالوقت اكتشفت ...  
انه عادى ...  
وانى برده حد عادى ...  
وان قربى ولا بعدى أمر عادى ...  
واعتيادى ...  
وان مشكلتى فى غبائى ...

والعشم بزیاده دائی ...  
وان ناس مش باقیه ایدا ...  
وانت لسه علیها باقی ...  
\*\*\*

## لابس وش



انا لابس وش ...  
انا ايوه بغش ...  
انا فاتنى اعيش ...  
انا لسه هناك ...  
عيشه فلاش باك ...  
دوشه وتشويش ...  
انا حلم وبس ...  
حاجه بتتحس ...  
صوره بتبهت ...  
وتروح بشويش ...  
\* \* \*

## إجابة ورد



عن الناس اللى طول الوقت ...  
كلامهم حلو بزياده ...  
وكالعاده ...  
مفيش إحساس ...  
مجامله ونبره معتاده ...  
كلام وخلص ...  
وناس تانيه بعيد عنك ...  
كلامهم بس لو لازم ...  
وبحبوك بكل سكوت ...  
عشان الحب والاحساس ...  
مهوش بالكلمه او بالصوت ...  
ده ياما كلام يبان معسول ...  
وجاى من قلب كرهه بجد ...  
وكام من ناس بتعشقنا ...  
كلامها قليل إجابة ورد ...

\* \* \*



## متأخر جدا



متأخر جدا ..

حبينا ..

وبقينا ..

مع بعض فى بيت ..

فيا ريت ..

لو فاضل فى العمر بقيه ..

يمكن أيام ..

نقضيهها محبه وحنيه ..

مش جفا وخصام ..

\*\*\*

## منصوب تعيش



هو انت ليه منصوب تعيش ...  
هامش فى صفحات البشر ...  
مركون كما حته حجر ...  
وتحس فيهم إدعاء ...  
الاهتمام ...  
مش بالكلام ...  
ولا بالدعاوى والوشوش الطيبه ...  
ولا انت منصوب تستحى ...  
تحسب لنفسك ميت حساب ...  
كما كل واحد م الصحاب ...  
حاول تروض جوه منك الانا ...  
وتحس بيك قبل اللى حاسينك فنا ...  
ليه نحس بالناس واللى يكسرهم اوى ...  
وهما لسه بيكسرونا بالأوى ...  
يبقوا فى حياتنا كل شئ ...  
واحنا فى حياتهم بس صفحه وتنطوى ...

\*\*\*

## فابريكا الازار ..



هتعيش متعيش ...  
بالطول والعرض ...  
لا هتلمس سما ...  
ولا تهجر أرض ...  
هتكون مجنون ...  
هتكون عاقل ...  
هتعيش مسجون ...  
فى محيط هائل ..  
زنزانه إزاز ...  
من غير برواز ...  
جواها الناس مفروضه عليك ...  
لو فاكركم متحكم ...  
الى بيحكم الكون حواليك ...

امسح نفسك بالأسيتيكه ...  
كن تحفه وحتة انتيكا ...  
لو كان جواك شخبطة وخدوش ...  
حطك فى جراب ...  
واكتب للبيع ...  
فول اوبشن .. صامت .. فابريكااااا  
\*\*\*

تم بحمد الله

من إصدارات مؤسسة زحمة كُتَّاب



### الشعر والخاطرة :

- لابس وش : علاء أحمد
- فعشقت مجدداً : أحمد لموم
- امرؤ الهلس : إسماعيل علي
- إنسان فالصو : محمد الشحات
- فأنت تفاح أخضر : عبد الرحمن حميدة
- ضل ونور : لمياء عامر
- تراتيل عاشقة : شاهنדה الزيات
- ثورة عاشق لم تكتمل : محمد أبو ذكري
- وجع الحنين : هيام الجمل
- أبجدية حب : كواعب البراهمي
- لك الحب : إيمان زايط
- حب في زمن حزين : السيد حسان
- فراغ عاطفي : على نمر
- ضل ونور : لمياء عامر
- هلايات : عبد الرحمن الهلالي
- الشتاء الأخير : آية على الشاعر
- مني لك : عبلة موسى، خالد غازي
- سكتة حب : عبلة موسى
- خلطة مطبعية : إيهاب الكيلاني

- خارج دواير الانتظار : أحمد رامي عبدالله
- ١/٢ كدر : عثمان عبدالمنعم
- لسه! : رفيدا حسن
- كلمات تروي حكايات : محمد العدلي
- خيال يرتب ألفاظه : د. محمد عبدالله الشيخ
- على ضفاف الزمن مررت بذاكرتي : سهير عبدالله رخامية
- ولي أمل : إسلام عبدالعزيز
- تحيا مصر : خالد غازي

#### الرواية والقصة القصيرة :

- استربتيز : منة الله رأفت
- الصامتون تحت الأرض : هبة حمدي
- المواجهة الملعونة : محمود شاهين
- العذاب الحلو : سالي غانم
- للأحلام اسم آخر لا نعرفه : محمد صلاح المصري
- طائر في الظلام : إيمان عبد الخالق
- هن : ولاء بيومي
- رجل ضد العالم : سمير زكي
- (HIV) من مذكرات مثلي : علاء أحمد
- للخطايا ثمن : محمد الجعفري
- جريمة أب : حازم خليفة

#### الكتب المجمعة :

- تليجرام : شعر
- سيلفي : شعر
- سيجا : شعر
- صف ثاني : شعر
- قلم رصاص : شعر
- ترابزين : شعر
- بارانويا : شعر
- بيانولا : قصة قصيرة
- ألوان : قصة قصيرة
- نيكثوفيليا : خواطر
- إنسانوبيكيا : شعر وخاطرة وقصة قصيرة

#### المقال والدراسات :

- مداد في حب الوطن : د.أحمد السعدي
- يا سكر : كريم عمرو، ياسمين التمامي
- كيميا الحب : سارة حسين
- لا مؤاخذه : أحمد مرسي
- مدن مصر المحروسة (حتمية الموضع، إمكانية الزمان) : علي محمود العبادي
- شرائع محرمة : كواعب البراهمي



لطلب إصدارات مؤسسة زحمة كُتَاب للثقافة والنشر،  
زوروا مقرها في : ١٥ شارع السباق، مول الميريلاند،  
مصر الجديدة، أو زوروا موقعها الإلكتروني لمعرفة  
أماكن التوزيع على مستوى الجمهورية، والدول  
العربية.

للتواصل :



[www.za7ma-kotab.com](http://www.za7ma-kotab.com)



[www.facebook.com/za7ma](https://www.facebook.com/za7ma)




[www.facebook.com/za7makotab](https://www.facebook.com/za7makotab)



[za7ma-kotab@hotmail.com](mailto:za7ma-kotab@hotmail.com)



٠١٢٠٥١٠٠٥٩٦



مؤسسة زحمة كُتَاب للثقافة والنشر

زحمة كُتَاب .. القدرة قرار !